



Pou Piblikasyon Imedya: 05/01/2022

GOUVÈNÈ KATHY HOCHUL

**GOUVÈNÈ HOCHUL ANONSE NOUVO SOULAJMAN FISKAL POU PLIZYÈ MILYE
TI BIZNIS AK PLIZYÈ MILYON NOUYÒKÈ NAN KLAS MWAYÈN NAN**

100 milyon dola nan soulajman fiskal pou 195,000 ti biznis atravè Eta a

***Akselere rediksyon enpo pou klas mwayèn nan pou bay soulajman pou 6.1
milyon Nouyòkè rive 2023***

***Nouvo pwogram ranbousman enpo pou bay soulajman siplemantè pou de milyon
Nouyòkè ki gen revni fèb ak mwayen***

***Kredi fiskal ki nouvo ak elaji pou sipòte batay fèm New York yo kont
ogmantasyon kou, pou retansyon anplwaye ak pou bay kapital pou nouvo
 ekipman***

Gouvènè Kathy Hochul anonse jodi a nouvo inisyativ pou bay soulajman fiskal pou plizyè milye ti biznis ak plizyè milyon Nouyòkè nan klas mwayèn lan nan kad ajennda 2022 Eta a. Plan an pral bay 100 milyon dola kòm soulajman fiskal pou 195,000 ti biznis atravè ogmantasyon yon ajisteman nan deklarasyon enpo pou redui revni dafè brit ti biznis yo. Plan an pral akselere tou aplikasyon 1.2 milya dola nan Rediksyon Enpo Klas Mwayèn aktyèl la pou 6 milyon Nouyòkè ki te fèk kòmanse aplike an 2018, epi etabli pwogram ranbousman enpo sou pwopriyete 1 milya dola a pou tounen mete lajan nan pòch plis pase 2 milyon Nouyòkè ki te gen pou andire ogmantasyon kou yo pandan pandemi an t ap avanse.

Anplis de sa, Gouvènè a pral kreye kredi enpo nouvo ak ogmante sa ki egziste a pou sipòte fèm New York yo ak pwodiksyon alimantè an jeneral.

"Pandan n ap kontinye batay kont enpak COVID-19 yo, nou dwe asire nou investi nan resous ki presye nan Eta nou an: popilasyon li an", **Gouvènè Hochul te deklare.**

"Plizyè milyon Nouyòkè, espesyalman pwopriyete ti biznis yo, fanmi nan klas mwayèn yo ak kominote granmoun aje nou yo, te frape di pa devastasyon ekonomik de ane pase yo, epi yo bezwen èd nou. Nou dwe akselere rekiperasyon nou non sèlman nan redui chaj fiskal la, men tou nan jwenn fason pou tounen mete lajan nan pòch Nouyòkè ki travay di yo ki sipòte ekonomi nou an".

Depi pwofondè ralantisman ekonomik COVID-19 yo jiska jodi a, New York te rekipere anviwon 1.2 milyon travay, epi nan kòmansman desanm lan, Gouvènè Hochul [te anonse](#) yon inisyativ pou konekte Nouyòkè yo ak 220,000 travay epi [te siyen](#) lejislasyon pou ogmante sipò Eta New York pou rekipere ti biznis yo.

Rekiperasyon ekonomik Eta New York la pa fini. To chomaj nan Eta a se 6.6 pousan - plis ke de pwen pi wo pase to nasyonal la. Anviwon 71 pousan ti biznis toujou rapòte efè negatif pandemi an. Nan jiyè, revni yo te rete anba nivo anvan pandemi an nan sèt sou trèz (13) gwo sektè travay New York.

Pou akselere rekiperasyon ekonomik la ak bay soulajman pou Nouyòkè yo, Gouvènè Hochul pral:

- **Bay 100 milyon dola nan soulajman pou 195,000 ti biznis:** Pandan ralantisman pandemi an te afekte nou tout, ti biznis yo te soufri plis toujou. Pou ranfòse rekiperasyon nan Eta a, Gouvènè Hochul pral bay 100 milyon dola kòm soulajman fiskal pou 195,000 ti biznis nan elaji elijibilite ak ogmante yon ajisteman nan deklarasyon enpo pou redui revni brit ti biznis. Pou di sa senp, yon modifikasyon soustraksyon pèmèt yon kontribiyab bese revni brit li nan yon montan ki egal ak yon sèten pousantaj renvi dafè nèt li anvan kalkil montan enpo li dwe. Lwa aktyèl la pèmèt yon modifikasyon soustraksyon 5 pousan pou antrepriz endividyèl ak biznis agrikòl ki gen revni ki mwens pase 250,000 dola — ki benefisye 5,000 kontribiyab chak ane. Gouvènè a pral ogmante modifikasyon sa a epi ajoute lòt antite avèk revni brit ki soti New York nan jiska 1.5 milyon dola, ki kouvri apeprè 195,000 ti biznis an gwo — sa ki tounen mete lajan nan men plis Nouyòkè ki travay di.
- **Akselere 1.2 milya dola nan rediksyon enpo klas mwayèn nan pou 6 milyon Nouyòkè:** An 2018, New York te kòmanse pwogresivman rediksyon enpo pou klas mwayèn nan, epi rediksyon an pa prevwa nan moman an pou li aplike nèt jiska 2025. Pou reflète devastasyon ekonomik COVID-19 la te pote a epi olye pou tann ti benefis siplemantè yo antre anvigè pou kontribiyab klas mwayèn yo, Gouvènè Hochul pral akselere soulajman pou fanmi yo ak kòmanse bay avantaj konplè sou rediksyon enpo de ane pi bonè - byen antre nan rediksyon enpo pwogresif klas mwayèn nan apati ane fiskal 2023, pi bonè posib. Aplike tout rediksyon efektif nan ane fiskal 2023 a pral akselere de ane rediksyon enpo, bay soulajman pou 6.1 milyon Nouyòkè.
- **Bay ranbousman enpo sou pwopriyete 1 milya dola pou plis pase 2 milyon Nouyòkè:** Avèk Nouyòkè yo k ap fè fas ak kou enflasyon nan makèt ak nan ponp, pandan y ap andire enpak ekonomik COVID-19 la yo, Gouvènè Hochul pral bay plis soulajman nesèsè atravè yon pwogram ranbousman enpo sou pwopriyete ki pral retounen lajan enpo bay fanmi ki gen revni mwayen ak fèb yo. Plis pase 2 milyon Nouyòkè pral elijib pou ranbousman, avèk fanmi ki gen revni fèb yo ak gramoun aje k ap resevwa pi gwo benefis. Nan kad plan Gouvènè a, mèt kay ki elijib yo pral resevwa benefis nan otòn 2022, nan nivo 1 milya dola.
- **Ogmante kredi enpo aktyèl yo ak kreye yon nouvo kredi pou sipòte pwodiksyon alimantè:** Mendèv agrikòl la pami kou pwodiksyon agrikòl ki grandi

pi vit nan New York. Pou ede fèm yo reponn ak difikilte sa a, Gouvènè Hochul pral ogmante yon kredi enpo pou mendèv aktyèl la ak kreye yon nouvo, pandan l ap elaji yon kredi enpo pou investisman nan ekipman pou konplete mendèv la ak rezoud mank yo. Sa gen ladan:

- Double kredi enpo retansyon mendèv agrikòl la: Pwopriyetè agrikòl yo aktyèlman elijib pou resevwa kredi enpo ranbousab yon montan fiks pou chak anplwaye agrikòl elijib jiska 2024. Pou ede fèm yo kenbe travayè yo, Eta a pral double montan fiks anyèl la pou chak anplwaye elijib ak pwolonje pwogram lan jiska 2025.
- Kreye yon nouvo kredi enpo pou lè siplemantè: Eta a pral kreye yon kredi enpo ranbousab pèmanan sou lè siplemantè yo pou nenpòt gwosè fèm lan nan Eta New York, pou konpanse ogmantasyon kou pou agrikiltè yo.
- Ogmante investisman nan kredi enpo: Investisman nan kredi enpo a te yon zouti pisan nan tan pase pou estimile investisman nan nouvo teknoloji ak ekipman. New York pral ogmante kredi enpo pou investisman aktyèl pou tout fèm nan Eta a, sa k ap pèmèt agrikiltè yo achte nouvo ekipman ki ka otomatize plis fèm yo pou reponn ak mendèv nan agrikilti k ap bese a.

###

Lèt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)